

Vaiaso o le Gagana 2016: Togisala tagata ma gagana ona o faamamafa taule tamaoaiga

Ua tatou aulia mai fo'i lenei vaiatau e faasino i la tatou gagana ma lona faatauaina i totonu o le malo o Niu Sila. Amata mai i le 2007 lona faailoina e le Niu FM, ua avea nei ma se tasi vaega taua o a tatou sauniga faalenuu i totonu o lenei atunuu, Aotearoa, ua avea ma o tatou aiga lona lua.

Talu mai le 2007 e to'atele Samoa i isi foi nuu ua latou apoina mai le fe'au i tua o le Vaiaso, ma latou faamamaluina fo'i. I le televave o ala o fesoota'iga ua mafai nei ona auai mai se uso Samoa taumamao e ala i se faasoa po o se lagona e faaalua. E moni lava, tatou te fesoota'i e ala i la tatou gagana.

E pei ona malie i upu a le ta'ita'i ta'uta'ua o Nelson Mandela, 'A e talanoa i se tagata i se gagana e malamalama ai e tau lea i lona ulu, ae afai e te talanoa i se tagata i lana lava gagana, e tau lea i lona fatu. E le tutusa le talanoa i se gagana ese ma se talanoaga e faia i la taua lava gagana. E fa gagana na tautala ai Mandela, ae sili ia te ia le gagana a ona tagata, na faafailele ai i lona tuputupu a'e.

E moni lava, e iai mea e le mafai e le gagana ese ona taliina e tusa i mana'oga loloto o tagata, na o le gagana moni e mafaia o lea. E ono faatusaina le sootaga talimana'o lena i le tina ma le pepe mai lava i le laasaga tauafua. Afai o le uso e faaigoa ai le sootaga toto o tagata e to'alua, e poto la le Samoa na ia faaigoa le afuafu sa 'aui ai le pepe o le fanua. Auā i totonu o le upu fanua o loo iai le gagana le tu ma le aga e feiloa'i ai. Poo fea la tatou te nonofo ma aumau ai, e le mafai ona suia na malosiaga o loo i totonu o i tatou uma.

Ae aogā le fautuaga a le fatusolo o Tate Simi mo le fanau tutupu a'e i fafo o Samoa, i lana solo, Avea ma Samoa, e iai upu ia (ua toe faamatalaina): A'o le leo Samoa, e le ina avea ma sē e leo Samoa, a ia e iloa ai le taua o le avea ma se tasi. I le a'oina o lau gagana, o le auala lena e te faailoa atu ai le taua o ou tua'a ma tua'a e te a'a mai ai. O lou sootaga i le afuaga o lau malaga o se tagata ola, na amata afua i totonu o le isi tagata ola, e aga'i i luma i isi fanua ma lalolagi fou. Pe tanu le fanua i eleele ese, ae mau pea le sootaga ma le nuu moni ona o le gafa o le gagana.

O le isi vaega o le solo e faapea mai, A'o fo'i ma faata'ita'i mea a Palagi. O se mea e tatau mo tupulaga fai a'e i lalolagi o gagana ma aganuu e tele. E le ina leo Palagi ai pe amio pei se Palagi a ia faa'oaina ai i isi tu ma vaaiga ma gagana o a'oga ma fesoota'iga.

E taua le ola fetāla'i i le sailiga a le tama ma le teine 'o ia' (sona tagata moni) i se nofoaga o lanu ma leo eseese.

E feagai le vaiaso o le gagana ma le Tala o le Tupe a le malo o Niu Sila. E le faigata ona iloa le tulaga o faiā a le faigamalo o loo tu mai nei ma le mataupu i gagana (ua tele ni faasoā ua fai i ai).

Ua faasea nisi o le vasega o saienitisi i le le lava o le faatupeina o galuega e puipui ai le vaomatua ma laau ma'o'i a Niu Sila ua iai i se tulaga lamatia. E faapena i manulele ma i'a o le sami. Lata mai nei le tuua'iga o se tasi matagaluega i lo latou iloa o mea faaletonu ae gugu e leai se tala. Talanoa lipoti i le maumau o tama'i i'a ua lafoa'i i le sami ona o upega tetelē o loo fa'aaogaina.

E mafai ona ola i'a ma manulele ma laau na o latou, ae le mafai ona ola tagata e aunoa ma na mea. Ae foliga mai i faaiuga a le tele o malo, e pito i lalo na mea ia latou fuafuaga ma faatatau.

I le tala o le tupe a Niu Sila e atagia ai faamamafa a malo o le lalolagi i nei aso. E fiafia ta'ita'i a le lalolagi e talanoa i tamaoiga

faaonaponei ma atina'e tulaga ese, ae faale talanoa i le tau e totogi. Valoia e nisi le tula'i mai o le ea mafanafana e avea ma Amaketa a le lalolagi i se taimi lata mai, pe a mataitū aga a malo pei o Saina ma le naunauga e pito i luma. Ona o le tausili, ua mafua ai le le manatu i le tau e totogi e tagata, e mafua ai le ituaiga mafaufau, afai e maua le sini i le gagana e tasi, e sili atu lena mo le tamaoaiga.

Lea fo'i e atagia i fuafuaga a le malo i lana Tala o le tupe. Ua ave le faamuamua i le saienisi ma le tekonoosi, ma le Igilisi e soaina, ae togisala mataupu (ma isi gagana) na e faatatau tonu i le tagata ma lona atina'e i le loto ma le agaga.

Ne'i galo i ta'ita'i o malo le taua o le tiute ua faae'e atu e o latou tagata – poo le Atua fo'i, i luga o i latou. E taua ai le faasao o tama'i i'a auā a taeao, se gagana laitiiti auā se lumana'i o e e ana le tofi ma le fa'asinomaga.

A o aga o le Vaiaso, e le tau lauga atu pe logo mai, auā o la ta gagana o le uso o le malosiaga o loo tatou taupipii ai ma le fanua (nuu moni), e mafua ai lo tatou naunau e faailoga.

O le fe'au fo'i lea i le manulauti o le Vaiaso, pe ofaga i Aotearoa, poo fea lava, e malu ma ola le gagana ona o lo tatou tinou e faaolaola ma taofiofi, auā so tatou lelei ma fanau.